

## Takurda-o Burus o wu gene yan-dor Yeso n-me bo-o o-Piripi

### Rem-se ro n-me à:

M-zantɛ 1:1-11

Rem-ɔs Burus se un hi un de un wu 1:12-26

M-hoog n-me un Kiristi 1:27—2:18

Zonge-ut Burus rem Timoti ne un Eparaditus  
2:19-30

Ur-kewes un ma-to un ya-ut-yage o-darem ne  
3:1—4:9

Burus un nay un wu ne wu un bo-o o-Piripi  
4:10-20

Ur-kom 4:21-23

### Ur-gas

<sup>1</sup> Me, Burus un **Timoti** ne yan-guw-m Yeso **Kiristi**,\* ro no m-gas, kap no ye ro n-me un bo-o o-Piripi à, ye gokse Yeso **Kiristi** à. Komo te m-gas un yan-gut-de un **yan-dor Yeso**, un yan-m-senge ne.†

<sup>2</sup> Me un kon-se Shir Tato na un Wan-Koyan ne Yeso **Kiristi**, wu 'ye no ur-ho un gwugwu-mo ur-hur ne.

### Bom un Shir un kon-se Shir ne

<sup>3</sup> Ko o ke da-o um nome us-barag un no ne, me un bom un Shir rem no.

---

\* **Bor-o gaan:1 1:1** Wu Shir daagne à. † **Bor-o gaan:1 1:1** Hyen komo: Seng 16:12.

4 Da-ɔ ɔm nɔmɛ ɔs-kɔn be-de Shir rem nɔ à, zak-o rɔ mɛ m-rɛ myet.

5 Bɔ ɔn ka hɔ-de nɔ gɔkse ma-ɔt Yeso à, nɔ sɛngɔtɛ m-mɔsɛ ɔt-hi ɔn mɛ nɛ, ɔn kɔ'ɔtɛ ɔn hun-nɛ ka **Ma-to m-Rerem** tɔ nɛ, har m-mɔka.

6 ɔm nɛpsɛ Shir wɔ taknɛ nɔm ɔn rii-yo ɔr-bon ɔn n-mɛ ɔn hur-ɔt nɔ à, wɔa sɛngɛ m-nɔm har wɔ komot kap, da-ɔ Yeso **Kiristi**, mɔɔnɛ be-ɔr na komo à.

7 Komo hond hond ɔ ɔm hɔgɛ bɔ ɔm hɔgɛ ɔn nɔ nɛ à, ɔ rwɔ'e mettɔ nɔ m-hwɔ ɔr-keɛr, remen nɔ rɔ ɔn mɔsɛ ɔt-hi ɔn mɛ nɛ, ɔn rwɔr ɔn ka **Ma-to m-Rerem** tɔ, tɔ Shir ya'sɔ mɛ m-rɔr à. Da-ɔ ɔm ro ke'o à, nɔ mɔssɔtɛ ɔt-hi. Komo da-ɔ ɔm ro be-de ɔn yan-piish ɔt-ma à, ɔm shɛrɛg o-nip ɔn rwɔr ɔn ka **Ma-to m-Rerem** tɔ ɔn kutɛ ɔn hun-nɛ ka **Ma-to m-Rerem** tɔ nip-tɔ.

8 ɔm wastɛ ɔn nɔ nɛ deɛn, hyangɛ bɔ **Kiristi**, Yeso wassɛ deɛn ɔn nɔ nɛ à. Shir nɛpsɛ ma-ɔt re nip-ɔ.

9 Yo ka yo mɛ ɔs-kɔn be-de Shir rem nɔ, remen nɔ sɛngɔtɛ m-was ɔn ɔr nɔ nɛ arɛ bɔ nɔ nɔmɛ n-ga à. Mɛ ɔs-kɔn nɔ bɔ'ɔsɛ ɔs-nap sɛ Shir ɔs-wɛɛr nɛ,

10 komo nɔa hoks m-daag yo jiishe à ɔn be-de yo ɔr-bon ɔn yo ba ɔr-bon nɛ. Komo nɔ waragtɛ kashi ɔn hun-nɛ, nɔ nɔm rii-yo hun-nɛ hette nɔ m-pyap á, har da-ɔ **Kiristi**, mɔɔnɛ à.

11 ɔm kɔnɔg bɔ hɔɔg-m nɔ ɔn hur-ɔr nɔ nɛ he m-dɔ m-kashi à, ɔn beɛb-ɔr Yeso **Kiristi**, kap yo ka yo mɛ ɔs-kɔn remen da-ɔ hun-nɛ nape ɔnze nɔ ɔs-barag nɔ nɔm kaane, yɛa 'ye Shir m-sɛk, yɛ bɔm wɔ.

*Ke'et-m re doog kɔ'ot  
un ka Ma-to m-Rerem to*

<sup>12</sup> Or re ne, yan-dor, um conog no nep rii-yo nomu me à un ka ho-to, yo zwop ka **Ma-to m-Rerem** to á, amba hun-ne deen gokste ma-ut Yeso.

<sup>13</sup> Ke'et-m re rwo'og karma-ne, ye ro ur-'er de un den-o ut-gwomo à, un ye ken ye ne kane m-nap unze me wan-dore un Yeso **Kiristi** wu.‡

<sup>14</sup> Remen ke'et-m re, rwo'og yan-dor Yeso deen bo'osute un jaab-o ut-men. Komo ye doste o-gyer un rwor un Ma-to Shir.

<sup>15-17</sup> Nip-o, ye ken ye ro m-ko'ot un ma-ut **Kiristi**, remen ye ro ur-shoob. Ye ko'ote ma-ut Yeso un con-mo ur-hur, ye ro m-con um su ur-koob ke'o à. Amba ye ken ye ko'otte ma-ut **Kiristi**, un hur-ur gaan, ye ka, ye ro m-ko'ot remen ye conog me, komo ye nepste Shir rwo'og me kaane a kutute hun-ne unze ka **Ma-to m-Rerem** to nip-o.

<sup>18</sup> Ko m-was! Me o-zak remen kaane ko yo ke cow-yo, hun-ne hoge ma-ut **Kiristi**. Ko ye ken ye ko'ot un hur-ut yoor, ko ye ken ye ko'ot un hur-ur gaan, um hogute o-zak, remen hun-ne hogute ma-ut **Kiristi**.

Komo man nom o-zak,

<sup>19</sup> um nese a ho'osu me remen kon-us no be-de Shir, komo un gwu ne o rwuune be-de un Kukt-o Yeso **Kiristi** à.

<sup>20</sup> Duw-de un con-m re un saktɔ re ne um re ur-ho ba m-'e un senge-mo Shir ko o ke da-o, um kum beeb-de us-rwun, remen m-moka un ko o

‡ **Bor-o gaan:13 1:13** Hyen komo: Seng 28:30.

ke da-ɔ ne, **Kiristi** wɔa hogɛ me ɔn sek-mɔ ɔn wu, kɔ ɔm nom hogɛ, kɔ ɔm mer.

<sup>21</sup> Hoog-m re rɔ myet be-ɔt **Kiristi**, me rɔ ɔn hogɛ ne, me mere, komo jiište be ɔn de.

<sup>22</sup> Man hoks ɔ ka m-nap yo m-daag á. Urege me ɔn hogɛ ne, man senge senge-mɔ m-nom ɔn rii-yo depe à.

<sup>23</sup> Hur-ɔr ɔn de wongute be-ɔt yoor. Um conog deen ɔm mer ɔm waragte be-ɔr **Kiristi** jiište me kaane.

<sup>24</sup> Amba me ro kanɛ be-ɔr nɔ ɔn hogɛ ne jiište rem nɔ.

<sup>25</sup> Um nepse jiište ɔr-bon rem nɔ me rɔ ɔn hogɛ ne, man she'et ɔn nɔ ne, a doto nɔ ha co, komo nɔ nom o-zak, nɔ sher be-de Shir,

<sup>26</sup> remen me ro be ɔn nɔ ne komo noa kum 'wons-mɔ ɔn bɔp ɔn Shir o-zak ne ɔn dore ɔn Yeso **Kiristi** ne, komo nɔ nom ɔs-sɛs rem re.

<sup>27</sup> M-mɔka rii-yo jiište à, nom nɔ bɔ **Ma-to m-Rerem** tɔ ma **Kiristi**, cone à, kɔ ɔm habe m-hyen nɔ, kɔ me habe á, man hogɛ nɔ eks m-'wons ne, kang-o gaan, komo cow-o gaan nɔ ine eso remen ye cone naas ɔn ka **Ma-to m-Rerem** tɔ à.

<sup>28</sup> Nɔ hogɛ gyer-ɔ ɔn yan-yage-ɔt nɔ á. Es nɔ m-'wons ne kɔ ɔ ke da-ɔ. Nom ɔn kaane, noa kute ye unze Shir a saburse ye. Amba wɔa gu nɔ remen Shir nɔ a deet nɔ n-ton.

<sup>29</sup> Um zeeg yo ka, remen Shir ya'ag nɔ da-ɔ ɔn goks ɔn ma-ɔt **Kiristi**, komo Shir ya'ag nɔ o-da nɔ su ɔr-koob ɔn wu ne.

<sup>30</sup> M-mɔka nɔ ɔn swɔ ɔr-koob, bɔ ɔm swɔɔ n-ga à, komo nɔ hyanag ɔn hi ɔn nɔ. Komo m-mɔka nɔ hogute unze har m-mɔka me ɔn senge-

mɔ ʉn swɔɔ ʉn ka kɔɔb-de ke'o.Š

## Bɔr-ʉs yoor

*Ma ʉn gwugwer-mɔ hi-ʉr Yeso*

<sup>1</sup> Remen **Kiristi**, ya'ag nɔ jaab-ɔ ʉt-mɛn, komo wʉ hamat nɔ, remen nɔ ʉn mɔrge-de ʉr-bon ʉn **Kukt-ɔ Shir** ne, komo ʉn hoge 'wɔn-ʉr ɔr ʉn nɔ ne, Yeso rɔ ʉr-'wɔn ne, wʉ conog nɔ komo.

<sup>2-4</sup> Barag-ʉs nɔ ʉs-gaan, con-m gaan, komo hur-ʉr gaan. Nɔ nom con-tɔ ʉr-hi á, ko ʉs-sɛs. Amba ɛss nɔ ʉr-hi gwɛrgwer ʉn ɔr nɔ ne. Nɔ gwɔt nɔ jiishte net á, amba gwɔt nɔ ʉnze a jiishte nɔ. Gwɔt nɔ ɔr nɔ ne, ba hi ʉn nɔ cot á. Nɔ nome yo ka, zak-o a ho me:

<sup>5</sup> Barag-ʉs nɔ nom ʉntʉn se ma Yeso **Kiristi**, kaane:

<sup>6</sup> Ya wʉ rɔ gaan ʉn Shir ne,  
amba wʉ dek hi ʉn de ʉn wʉ hond hond ʉn  
Shir ne á.

<sup>7</sup> Amba wʉ muute hi ʉn de ʉn wʉ hwaa,  
wʉ warguru ko-guw ʉntʉn net.

Komo bɔ wʉ haante à, ʉn wur-ɔ ʉn net,

<sup>8</sup> wʉ gwɛregsuru hi-de ʉn wʉ.

Komo wʉ nomuru o-dorotte ɔ woote wʉ m-mar  
à,  
n-tɔn o-kan.

<sup>9</sup> Remen wʉ nomog kaane, Shir jakste wʉ  
ʉn be-de jiishe à,  
wʉ sagburu wʉ ʉt-gwomo tɔ jiishe  
kɔ tɔ ke gwomo-tɔ à.

---

Š **Bɔr-o gaan:30 1:30** Hyen komo: Seng 16:19-40.

- 10 Shir ʊn nɔm kaane, remen kɔ se ke rwun-se a  
kwukt,  
se 'ye Yeso m-sek,  
kɔ n-ton, kɔ n-dak, kɔ ne n-me o-dak.
- 11 Kɔ wu ke ne a zee,  
"Yeso **Kiristi** rɔ Wan-Koyan,"  
nɔm ʊn kaane, a hante m-seps be-de Shir  
Tato na.\*

*M-cecas untun yege-regen*

12 Or re ne, yan-dor, ma nɔ Yeso, dorotte-o nɔ  
rɔ m-nɔm da-o ʊm ro be-ur nɔ à. ʊm conog m-  
moka dorotte-o nɔ jiish o n-ga. She'et nɔ kaane,  
remen nɔ ye'et Shir ut-gos, ʊn gyer-o ʊn wu  
remen wu guug nɔ.

13 Remen Shir rɔ ʊn senge-m ʊn nɔ ne, nɔ cun  
m-nɔm ne, komo nɔa hoks m-nɔm rii-yo wu cone  
nɔ nɔm à.

14 Nɔm nɔ kɔ yo ke rii-yo ba us-cenene, ko  
sune-mɔ ut-ma.

15 Bɔ hur-ut nɔ he ut-pus to, ba ut-reeb, nɔ  
warag kashi ʊn yakar-ye Shir n-tete o ʊn yan-  
hur-ut rim-to ʊn kaane yea hyen nɔ m-cecas ne  
untun yege-regen kyarkyar n-te o-comb.†

16 Nɔ kɔ'ot ka ma-to rɔ ʊn 'ya m-hoog à, remen  
ʊm nomot us-ses rem nɔ, ʊm nept senge-m re ja  
m-ho á, ʊn ho-de **Kiristi**, he m-muun à.

17 Amba kɔ a duus me untun rii-yo m-swo yo  
ur-**seke** ʊn guw-mɔ rɔ m-rwuun ne be-de ʊn  
sher-m nɔ à, me m-hoge m-rerem o-zak ne ʊn  
nɔ kap.

\* **Bɔr-ʊs yoor:11 2:10-11** Hyen komo: Isha 45:23 (ut-Girik).

† **Bɔr-ʊs yoor:15 2:15** Hyen komo: Kara 32:5.

18 Un remen kaane no ma nom no o-zak un me ne.

*Timoti un Eparaditus ne*

19 Me o-sakto unze Wan-Koyan Yeso a toso me m-tombe **Timoti** ba un naas o-da be-ur no, remen wu ye'et me jaab-o ut-men, da-o wu waktune komo wu ruru me rii-yo ur-bon yo no m-nom a.

20 Yatt-wu arge wu kané be un de á, wu conu no untun **Timoti** á. Hur-de un wu ro co co be-ur no.

21 Um zeeg yo ka remen ko wu ke wu conog hi un de un wu, hur-de un ye ro co co be-ur Yeso **Kiristi** á.

22 Amba no nepste **Timoti** kutute hun-ne unze wu bo'oste. Bo wa ro un nom m-senge un tato un wu ne a, wu ko'ote ka **Ma-to m-Rerem** to un me ne.

23 Me o-sakto, man tombe wu, da-o um nape be-de um ro a.

24 Um nepste un hur un de, o ka: Wan-Koyan a gu me komo man habe be-ur no ba un naas o-da.

25 Amba um waksute hur un de, ur-takan, man tombe or re wan-dor, Eparaditus, wu waragbe be-ur no. Wu nomog m-senge un me ne, un rwor un ka **Ma-to m-Rerem** to. Komo wu rangute un me ne be-de yan-yage-to un Ma-to Shir. No tomonte wu rem no, komo wu haante, wu guug me un yo um cone a.

26-27 No hogute unze wu piishe á, har wu ba'aste m-mar. Bo wu nape unze no hogute wu piishe á, hur-de un wu nassute. Wu con no naas

ur-hur remen wu á. Man tombe wu remen hur-ur no gwurute. O-nip, wu ro piishete á. Amba Shir wu yage wu meret á, Shir muuntute wu kerker. Ba wu Shir kute ur-'won cot á, amba un me ne. Wu con me um kum penem-se un men-ut rim-to, komo un do o un yo um rotte á

<sup>28</sup> O hante um tunut deen um tombe wu waragbe be-ur no, remen no hyenet wu, komo no nomot o-zak, komo barag-us re hept.

<sup>29</sup> Remen kaane, goksbe no wu o-zak ne un cow-yo Wan-Koyan he m-con no nom à. 'Ya no wu m-sek komo un ye ken ye ne untun wu,

<sup>30</sup> remen wu ba'aste m-mar remen senge-m **Kiristi**, un jore un hi-de un wu. Wu un nom yo ka remen wu guut me bo noa hoks me m-nome á, remen no ro kané á.

## Bor-us tet

### *Me sher un senge-m re á*

<sup>1</sup> Ko ya nome, or re ne, yan-dor. Yeso um konog Wan-Koyan wu 'ye no o-zak un rii-yo no m-nom à. Man ker un gene un no tomso ne, rii-yo um ro genetü na n-ga á, remen yo he no m-gu be-de yan-raks-ut no.

<sup>2</sup> Ine no eso un go un ka hun-ne ye ro sa o zee yege-sakra à, ye ro shiishe un men-ut jaas-to à, un ye ro un ceturu ut-wur ne à, ye zee se a koog no, no kumut gwu.

<sup>3</sup> Ye ro m-zee ye ro hun-ne ye Shir\*, amba na ro hun-ne kashi-ye Shir, remen **Kukt-o Shir** ro na m-gu un bongon-de Shir, komo te shereg un

\* **Bor-us tet:3 3:3** *hun-ne ye Shir* ut-Girik: ya-ur-ko.



rii-yo **Kiristi**, Yeso nome à. Te us-ses un rii-yo Yeso nome à, a sher un yo a nome a hante á.

<sup>4</sup> No nepste unze man hoks m-wos ur-be remen rii-to nome untun ur-ko à. Amba me nom á. Urege ye ken ye ro us-ses remen rii untun ur-ko, um conog ye m-kute unze um aragsute ye.

<sup>5</sup> Ho-ur aeere-de un mat-o re, a koog me, bo Shir rure ya-n-ga-ye à. Me ko-**Isra**-wu, komo un baag-o **Banyamin**. Me ko-Ibra wu zak. Me ko-**Parisa**-wu, remen kaane, me o-dorotte o un **karamsa**-o te, o un **Yahuda**-ne hond hond.†

<sup>6</sup> Um ya'ag **yan-dor Yeso** ur-koob remen men dor o o-**karamsa** kom-ut yoor. Me m-zee ko net kashi um ro remen me m-dore myet rii-yo **karamsa**-o zee à. Me ku ko o-gaan á.‡

<sup>7</sup> Ka rii-yo um ro m-zee yo ro me m-gu à, m-moka um nepste myet hwaa-o, remen um nak rii-yo **Kiristi** nome à.

<sup>8</sup> Komo um nepste ko yo ke rii-yo hwaa-o, nap-us Yeso **Kiristi**, Wan-Koyan aragte koyan. M-moka um jorete kap ko yo ke rii-yo n-te o-buse, remen um she'ette un **Kiristi** ne, be-ur gaan.

<sup>9</sup> Komo um nept me kang-o gaan un wu ne, me m-oog un rii-yo ur-bon yo um nome á ko dorotte-o un **karamsa**-o Shir. Amba um shereg be-ur **Kiristi** wu guut me, remen cow-yo Shir hette na muut tete un wu ne à, se a shereg un wu.

<sup>10</sup> Myet yo um cone à, yo ro um nep **Kiristi**, komo um nept beeb-de 'yonse wu un hoog à. Um hokste m-yoos un swo ur-koob un wu ne, um

† **Bor-us tet:5 3:5** Hyen komo: Roma 11:1; Seng 23:6; 26:5.

‡ **Bor-us tet:6 3:6** Hyen komo: Seng 8:3; 22:4; 26:9-11.

waragte ɔntɔn wa o-dɔrotte har ɔ wo m-mar à.

<sup>11</sup> Remen kaane, ɔn yo ken cɔw-yo ɔm nept ine-mɔ ɔn margan-ne.

*Senge-mɔ m-senge ɔm reet ɔr-hɔ à*

<sup>12</sup> Me zee ɔm nak kɔ ɔm reeg ɔr-hɔ ɔn kap ka rii-yo á. Komo me zee Shir komoste ma-ɔt re á. Amba me m-senge deen, ɔm waktute kap yo Yeso **Kiristi**, cone ɔm wakte da-ɔ wɔ daage me à.

<sup>13</sup> Or re ne, yan-dor, me zee keeg-yo ɔm rɔ á, ɔntɔn wɔ á. Amba rii gaan ɔm cone m-nɔm kap: ɔm conog tɔ-tɔ ke me yo arage à, amba ɔm senge ɔn yo rɔ co à.

<sup>14</sup> Bɔ wa-ɔt-mur rɔ m-senge, wɔ reet ɔr-hɔ be-de ɔt-mur à, man rɔ beeb ɔn de kap remen ɔm reet wan-mur-ɔt re, remen Shir ru'ɔt me be-de ɔn keeg ne. ɔm she'ete n-ton be-de Shir remen **Kiristi**, Yeso ya'ag me ɔr-hɔ.

<sup>15</sup> Remen kaane, kap nɔ, ye nape rii-yo nɔ rɔ m-nɔm à, nɔa huɔ ɔr-hur ɔn ka rii-yo me ɔt-ma remen yo à. Komo urege nɔ dek ka rii-yo me m-zee á, Shir a gu nɔ m-ceker hond hond.

<sup>16</sup> Amba a nom nɔ o-dɔrotte ɔ o-nip ɔ ɔn yo a rege a yoosute à.

<sup>17</sup> Or re ne, yan-dor, mossu nɔ ɔt-hi ɔn ma-ur Yeso **Kiristi**, bɔ me m-nɔm à. Komo nɔ wer ka ye rɔ ɔr-she'et ɔn gon ka cɔw-yo te yoosu nɔ à. §

<sup>18</sup> Remen ɔm russutu nɔ co co n-ga, komo ɔm zee yo yish-m yish, ye ken hun-ne ye rɔ kon ye rɔ m-nɔm ɔn rii-yo kute ɔnze ye rɔ yan-yage-ɔt **Kiristi**, wɔ meret n-ton o-kan à.

---

§ **Bɔr-ɔs tet:17 3:17** Hyen komo: 1Kor 4:16; 11:1.

19 ʉr-kom, Shir a saburse ye remen ye rɔ m-nom un rii-yo ye cone à, kut-o un ye rɔ Shir o un ye, ye rɔ un nom us-ses da-o ye nome rii-yo depe ye hoge m-e à. Ye shooste hi-de un ye un barag-se gon hun-ne ye 'yare Shir à.

20 Amba na, hur-ur na rɔ n-Ton un shir komo na ur-'er de un **Wan-Gwu** rwuunte reeno Wan-Koyan, Yeso, ka **Kiristi**-wu, wu Shir swore o-nu rem na à.

21 Da-o wu muune wua baramse wur-ut na kane n-dak remen a kumut wur-ut pu-to gon o ma un wu o ur-beeb da-o Shir 'yonse wu ut-marimar à. Wua baramse wur-ut na un mure un ka 'wons-mo wu hette garamse un ko yo ke rii-yo à.

## Bɔr-ʉs nass

1 Or re ne, yan-dor, um waste un no ne, komo me o-sakto m-hyenet no, hakkure no sengu no odorotte un Wan-Koyan, no senge m-sher un wu, no ru me o-zak, un ses-us ne.

### *Ma-to m-Rerem*

2 Etutodi un Sinutike no hakkure no yage msuune un ma-ut no, amba ess no ur-hi be-ur gaan, bo no rɔ yan-dore un Wan-Koyan à.

3 Wan-yen de, um konog o gu ka ne'a-ne ye, remen ye un Kurement ne, nomog m-senge un me ne, un myet un yan-ko'ot un **Ma-to m-Rerem** ne, ye ka, Shir geneg jin-to un ye un takurda-o un hoog-mo ba m-ta.

4 Nom no o-zak un Wan-Koyan koyanda, komo me no m-zee zak-o re no.

<sup>5</sup> Yage myet hun-ne hyen gwugwer-mo ur-hi un no, un kap yo no m-nom a, remen Wan-Koyan roon ba un naas o-da.

<sup>6</sup> No ho hi un no un barag-se un rii a. Amba ruru no Shir rii-yo no cone a, nom no us-kon un hur-de ur-bongon.

<sup>7</sup> No senge kaane, Shir a 'ye no gwugwu-mo ur-hur, mo jiiشه napse un net a. Wu a dossu no rii-yo rangsu no a, remen no shereg be-ur Yeso **Kiristi**.

<sup>8</sup> Un to ka ma-to, or re ne, yan-dor, um conog no ess hur-ut no un ko yo ke rii-yo ro: o-nip a, rii-yo depe a, rii-yo ro kashi a, rii-yo ro ba m-kukop a, rii-yo hun-ne he m-was a, yo a he m-rwor **Ma-to m-Rerem** a, rii-yo jiiشه ur-bon a, un rii-yo woq ur-bongon ne a.

<sup>9</sup> Nom no myet yo um yoosu no a, un yo no gokse ne a. Ko yo no hoge be un de a, ko yo no hyane me m-nom a. Nom no gon kaane, Shir wa-m-'ya un gwugwu-mo ur-hur, wu a she'et un no ne.

### *Me ur-bongon un yar-m no*

<sup>10</sup> Ur-kom, bo no bakse un me ne a, me ur-bongon deen be-de Shir. Komo bo no hwo me ur-hur a, um nepste me ka no ut-to a. Amba no kum ur-keer no kutute me a.

<sup>11</sup> Yanze me no um rure un ka ma-to remen um conog yo ken rii-yo a. Um yooste bo um he m-sheer un rii-yo um rotte a.

<sup>12</sup> Um nepste yo koqb-ur ro a, komo un yo kwum-o ro ne a, um yooste bo um he m-sheer un ko yo ke rii-yo koru me a, ko me un coog ne

kɔ m-mɛr, ʉm nepstɛ bɔ ʉm he o-zak à, kɔ ʉm rɔ o-kwum nɛ kɔ da-o ʉr-kɔɔb.

<sup>13</sup> Man hoks m-nɔm ʉn kɔ yo ke rii-yo, remen **Kiristi**, ya'ag mɛ ʉr-bɛɛb.

<sup>14</sup> Myet ʉn kaanɛ nɛ, mɛ ʉr-bɔngɔn bɔ nɔ mɛ m-gu m-mɔka bɔ mɛ ʉn swɔ ʉr-kɔɔb à.

<sup>15</sup> Nɔ ya-o-Piripi nɔ nepstɛ ʉr-takan yo ʉm he nɔ m-rurɛ à, bɔ ʉm nape yo à. ʉr-takan, da-o nɔ hogɛ **Ma-to m-Rerem** à, tɔ ma Yeso **Kiristi**, wʉ ʉm rwɔrɛ ma-to ʉn wʉ à, da-o ʉm rwʉʉnɛ ʉm yagne dak-o nɔ o-Makidoniya, yatt **yan-dor Yeso** yɛ gu mɛ ʉn hwɔr nɛ remen yo ʉm cɔnɛ á, sɛ nɔ cɔt.

<sup>16</sup> Kɔ da-o ʉm ro'e o-Tasaronika, n-mɛ ʉn dak-o o-Makidoniya, nɔ tomsunte mɛ yar-mɔ ʉn hwɔr ba o-gaan á, amba o-yoor, da-o ʉm cɔnɛ gwʉ à. \*†

<sup>17</sup> Ba remen ʉm cɔnɔg nɔ 'ye mɛ m-yar á, amba ʉm cɔnɔg nɔ 'ye m-yar remen Shir topotɛ nɔ.

<sup>18</sup> Nap nɔ ʉnze yo nɔ tɔmnunte mɛ à wɔonte be ʉn de, komo yo aragte bɔ ʉm cɔnɛ à, cin da-o Eparaditus hante mɛ ka saw-to nɔ tɔmontɛ wʉ à. Ya rɔ sa o zee nɔ ya'ag Shir nɔw-mɔ m-shi'igin, mɔ ʉr-**seke**, Shir gokstɛ, komo wʉ hogutɛ m-rerem.‡

<sup>19</sup> Komo Shir wʉ mɛ ʉn dor à, wʉa 'ye nɔ myet rii-yo he nɔ m-gu ʉn she'et-ʉr nɔ à. Wʉa nɔm yo ʉr-hur sak ʉn mɔk-o ʉn wʉ, o-kwum nɛ ʉn **Kiristi**, Yeso.

<sup>20</sup> Koyanda, a sɛkɛmsɛ nɔ Shir, Tato na n-Tɔn ba ʉr-ma. Shir zee kaanɛ!

---

\* **Bɔr-ʉs nass:16 4:15-16** Hyen komo: 2Kor 11:9. † **Bɔr-ʉs nass:16 4:16** Hyen komo: Sɛng 17:1. ‡ **Bɔr-ʉs nass:18 4:18** Hyen komo: Rwʉʉ 29:18.

*Gas-de ɔr-buste*

<sup>21</sup> Gas nɔ bɔ ɔn wu gɔkse wu sher ɔn Yeso **Kiristi** à. Ɔr re ne, yan-dor, ye rɔ me m-gu kaane à, ye tɔmbute gas-de ɔn ye be-ɔr nɔ.

<sup>22</sup> Kap yan-dor ye Shir, ye rɔ ɔn ka bɔ-ɔ à, ye rɔ nɔ m-gas ɔn ka guw-ne ye ne, ye rɔ ɔn hur-ɔ ɔn ko-Gwɔmo **Sisar** à.

<sup>23</sup> Me ɔs-kɔn be-ɔr Wan-Koyan Yeso **Kiristi**, wu 'ye nɔ ɔr-hɔ kap.

## **ut-Hun New Testament**

### **Hun-Saare: ut-Hun New Testament New Testament**

copyright © 2017 Wycliffe Bible Translators, Inc.

Language: Hun-Saare

Contributor: WBT Central Zone

© 2017 Wycliffe Bible Translators, Inc. in cooperation with the Ut-Hun Bible Translation Project All rights reserved. The New Testament in ut-Hun (Eastern Dukawa)

All rights reserved.

2020-11-17

---

PDF generated using Haiola and XeLaTeX on 28 Dec 2024 from source files dated 29 Jan 2022

4b40cd80-7cb8-5d3d-8563-557f030f99d7